

ሃጌ ቲንቢቲ ጊደ ቆፋ

ሃጌ ቲንቢቲን የቴቲዳ ቃንላ ከታቲ ከርስቶሳ ዩሌታፔ 500 ላይላፌ ሲንላን ጸሲ ናቤ ሃጌ ባጋራ አሊዳ ከታታ። ዳሬይ ቤቴፔ ሲሚዲ ዩሩሳላሚን ዲስ ደሚን ጉላ ላይላቲ አጂኮካ ጸሳ ኬላይ ካሴ ላሌቲዳሶሆን ዳስ፤ ሄሳ ጊሻስ ዪዳ ከታይ ዳሬዛ ካሌሊዛይታን ኢስቲ ጸሳ ኬላ ኬጺሳና ማላ ዳንፊላናሳ፤ ዳሬዚ ኦራጺዲኔ ጌሻቴላን ዲኮ ጸሲ ሲንላፌ ኣሳስ ሳርቴሊኔ ዲሬቴላ ኢማናይሳ የቴስ።

ሃ ማጸፋይ ኦይኪዳ ኩሜላ ቆፋ

ጸሳ ኬላይ ኬጺታና ማላ ጎዳ አዛዙ 1:1-15

ጎዳይ ዳሬዛስ አሚዳ አንጆኔ ሚንፊሉ 2:1-19

ጎዳይ ዜሩባቤሌስ አሚዳ ሂደታ 2:20-23

ጸሳ ኬሊ ኬጺታና ማላ አሚቲዳ አዛዙ

¹ ዳሪዮሲ ካዋቲዳ ናሞኣንሉ ላይላን ኡሱፑንላ አገናይ ጌሊዳ ኮይሮ ጋላስ፡ ጎዳ ቃላይ ናቤ ሃጌ ባጋራ ዩሁዳ ዳሬ ሃሪዛ ሳላቲያሌ ና ዜሩባቤሌኮኔ ቄሴታ ሃላቃ ኢዮሳዶቄ ና ኢያሶኮ ሂዘጊሼ ዪዳስ።

² ጎዳይ ኡባፌ ዋልቃማ ጸሳይ፡ «ሃይሲ ዳሬይ፡ ‹ጸሳ ኬሊ ኬጺቲዛ ዋዴይ ቡሮ ጋኪቤና፡ ጌስ።»

³ ጎዳ ቃላይ ናቤ ሃጌ ባጋራ ሂዘጊሼ ዪዳስ።

⁴ «ታ ኬላይ ላሌቲ ዲሺን ኢንቴ ሎኦ ኬላን ዳናስ ሃይሲ ኢንቴስ ቤሲዛ ዋዴይ?»

⁵ ሄሳ ጊሻስ ጎዳይ ኡባፌ ዋልቃማ ጸሳይ ኢንቴና፡ «ኣኔ ኢንቴ ኦሶይሳ ቆፒቴ።

⁶ ዳሮ ዜሪዴታ ሺን ጉሉ ማጺ ሺሺዴታ። ሚዴታ ሺን ካሊቤኬታ፤ ኡዪዴታ ሺን ኣሊቤኬታ፤ ማይኢዴታ ሺን ማይኦይ ኢንቴና ሆኢቤና፤ ዳሞዛ ኤኪዴታ ሺን ኢንቴ ኤኪዳ ዳሞዛይ ዳኬላ ካራጺቴን ዋሊዳይሳ ማላ» ጌስ።

⁷ ጎዳይ ኡባፌ ዋልቃማ ጸሳይ፡ «ኣኔ ኢንቴ ኦሊዳይሳ ቆፒቴ።

⁸ ፑዴ ዙማ ቦላ ኬዚዲ ሚላ ኤኪ ዪቴ፤ ኬላካ ኬጺቴ፤ ታኒካ ኢዛን ኡፋይታናኔ ቦንቹታና» ጌስ።

9 ጎዳይ ኡባፌ ዋልቃማ ጸሳይ፥ «እንቲ ዳሮ ዳማና ጊዴታሽን ጉል ዳሚዴታ፤ ሂኖካ እንቲሶ ጌልሊዳ ዋዴ ታ ፑና ቆይሳዲሰ። ሄሳ ታ ኦሊዳይ እንቲሰ ኣይ ሚሳቲዜ? ታ ኬላይ ላሌቲ ኡቲን እንቲ ዉሪካ እንቲ ኬል ኬጸናሰ ዋጺዛ ጊሻሳ።

10 ሄሳ ጊሻሰ እንቲ ጌዶን ሳሎፔ ፑሴይካ ዲጌቲዴሰ፤ ቢታይካ ካል ዲጊዴሰ።

11 ታኒካ ጎሻታ ቦላኔ ዙማታ ቦላ፥ ካል ቦላኔ ኦራል ዋይኔ ኡሻ ቦላ፥ ዛይቲ ቦላ፥ ቢታይ እሚዛ ኣይፌ ኡባ ቦላ፥ ኣሳ ቦላ፥ ሜሄ ቦላኔ እንቲ ኩሼ ኦሶ ኡባ ቦላ ኮሻ ኤሃና» ጌሰ።

ጎዳሰ ዴራ ኣዛዜቲል

12 ሄሳፌ ጉዬ ሳላቲያሌ ና ዜሩባቤሌይ ቄሴታ ሃላቃ ኢዮሳዶቄ ና ኢያሶይኔ ዲኤቲላፌ ሽምፖራ ፓጸ ሲሚዳ ኣሳይ ጎዳ ባንታ ጸሳ ቃላኔ ናቤ ሃጌ ባጋራ ጸሲ ኪቲዳ ቃላሰ ኣዛዜቲዳ። ኣሳይካ ጎዳሰ ያዪዴሰ።

13 ቃሴካ ጎዳይ ኪቲዳ ሃጌይ ሄሳ ጎዳ ኪታ ዴሬዛሰ፥ «ጎዳይ ታ እንቲናራ ዳይሰ» ጌሰ ጊዲ ዮቲዴሰ።

14 ሄሳ ጊሻሰ ጎዳይ ዩሁዳ ኣይሲዛ ሳላቲያሌ ና ዜሩባቤሌ፥ ቄሴታ ሃላቃ ኢዮሳዶቄ ና ኢያሶይኔ ዲኤቲላፌ ሽምፖራ ፓጸ ሲሚዳ ዴሬዛ ኡባ ዋዚና ዴንፊሊዴሰ። ኣሳይካ ዪዲ ባ ጎዳ ኡባፌ ዋልቃማ ጸሳ ኬል ኬጸ ዶሚዴሰ።

15 ሄሲካ ዳሪዮሲ ካዋቲዳ ናምኣንሶ ላይላን ኡሱፑንላ ኣገናይ ጌሊዳ ናምኡ ታማኔ ኦይዳንሶ ጋላሰ ሃኒዴሰ።

2

ኦራል ኬጾቲዛ ጸሳ ኬል ቦንቾ

1 ላፑንላ ኣገናይ ጌሊዳ ናምኡ ታማኔ ኢሲንላ ጋላሰ ጎዳ ቃላይ ናቤ ሃጌ ባጋራ ሂዘጊሼ ዪዴሰ።

2 ጎዳይ ኡባፌ ዋልቃማ ጸሳይ ሃጌሰ፥ «ዩሁዳ ኣይሲዛ ሳላቲያሌ ና ዜሩባቤሌሰ፥ ቄሴታ ሃላቃ ኢዮሳዶቄ ና ኢያሶሲኔ ዲኤቲ ሽምፖራ ፓጸ ኣቲ ሲሚዳ ኣሳሰ።

3 «እንቲ ጋርሳን ሃይሳ ኬል ካሴ ኢዚ ቦንቾራ ዲሺን ቤኢዳዴይ ኦኔ? ሃኢ ቃሴ እንቲሰ ኣይ ሚሳቲ ቤቲዜ? ሃይሲ እንቲ ኣቻን ቆዳን ጌሎንታዝ ጊዴኔ?

4 ሃኢ ቃሴ ዜሩባቤሌ ሚና! ቄሴታ ሃላቃ ኢዮሳደቄ ና ኢያሶ ሚና! ኢንቴኖ ሃ ዳሬ አሳቶ ወሪካ ሚኒቲ! ታ ኢንቴናራ ዲዛ ጊሻሰ ኦሊቲ» ጋ ዮታኔ ኦይቻ።

5 ኢንቴ ጊብጾፔ ኬዚዛ ዋዴ ታ ኢንቴሰ፡ ታ ኢያናይ ኢንቴናራ ዲዛ ጊሻሰ ባቦፍቲ» ጊዳ ቃላይ ሃይሳ።

6 «ጎዳይ ኡባፌ ዋልቃማ ጸሳይ፡ ማታ ዋዴ ታ ናምኣንሶ ሳሎኔ ሳኣ፡ አባኔ ቢታ ኢሲቶ ቃላና።

7 ካዋቴላታ ኡባ ታ ቃሴላና። ካዋቴላታ ኡባ ሃርይ ሃ ያና ማላ ታ ኦላና። ሃይሳ ሃ ኬላን ታ አንጆ ኩንላና።

8 ኩሜላ አላሜን ዲዛ ቢራይኔ ዋርቃ ኡባይ ታሳ።

9 ሃይሳ ሃ ኬላ ቦንቾይ ካሴ ኬላ ቦንቾፌ አቆና። ታኒ ሃይሳን ኢንቴሰ ኩሜላ ሳርቴል አማና » ጌሰ።

ናቤ ሃጌይ አሚዳ ዘሬ

10 ዳሪዮሲ ካዋቴዳ ናምኣንሶ ላይላን ኡዱፋንሶ አገናይ ጌሊዳ ናምኡ ታማኔ ኦይዳንሶ ጋላሰ ጎዳ ቃላይ ናቤ ሃጌ ባጋራ ሂዘጊሼ ዪዴሰ።

11 ጎዳይ ኡባፌ ዋልቃማ ጸሳይ፡ «ሙሴ ዋጋይ ኣይ ጊዛኮ ቄሴታ ሃላቃታ ሂዘጋ ኦይቻ።

12 ኢሲ አሲ ጸሳሰ ያርሼቲዛ አሾ ባ አፋላ ቃላምኦ ጊደን ኤኪኮ ሄ ማይኦዛራ ዲዛ አሾይ፡ ዋይኮ ኡኬሊ ዋይኮ ዋጾይ ዋይኮ ዋይኔፔ አጌቲዳ ጫጃይ ዋይኮ ዛይቲይ ዋይኮ ሃራ ኣይ ቆሞ ካል ኢዚ ቦቺኮ ሄ ቦሼቲዳይሲ ጌሽ ጊዳንዴ?» ጊዲ ኦይቺን ቄሴቲካ፡ «ጌሽ ጊዳና» ጊዲ ዛሪዳ።

13 ሃጌይ ቃሴካ፡ «ኣሃ ቦቺዲ ቱኒዳ አሲ ሄይታፔ አሳ ቦቺኮ ሄ ቦሼቲዳ ካላይ ቱናንዴ?» ጊ ኦይቺን ቄሴቲካ፡ «ኤ ቱናና» ጊዲ ዛሪዳ።

14 ሄሳፌ ጉዬ ሃጌይ፡ « ሳይሲ ዳሬይኔ ሃይሳ ባጋ አሳይካ ሄሳ ማላ፤ ኢሰታ ኦሶይኔ ኢሰቲ ታሰ ሺሺዛ አምታይ ወሪካ ሄሳ ማላ ታ ሲንሳን ቱና » ጌሰ ጎዳይ።

ጸሲ ዜሩባቤሌሰ አሚዳ ሂደታ

15 «ጎዳይ፡ ሳሃቼፌ ደሚዲ ጸሳ ኬላ ገምቤታ ደማናፔ ካሴ ኢንቴ ቦላን ጋኪዳይሳ ኣኬኪቲ።

16 ኢንቴ ናምኡ ኮንታሌ ካል ኤካና ጊዲ ካላ ደሬኮ ቢዴታ ሺን ኢሲ ኮንታሌ ጸላ ዳሚዴታ። ኢሲ ጾቱ ሊቲሮ ጊዲዛ ዋይኔ

ኡሹ ኤካናስ ጊዲ ወይኔ ኡሹ ጉሞኢዛሶሆ ቢዳታ ሺን ፔጸ ኦይዱ ታሙ ሊቲሮ ጸላ ዳሚዳታ።

17 ታኒ ኢንቲ ኩሼይ ኦሊዳዝ ወርሳ ኩቱልኤን፣ ቆሻኒኔ ሻቻን ቆይሳዲስ፤ ጊዲኮካ ኢንቲ ቃሴ ሃ ታኮ ሲሚቤኬታ።

18 ሃኖ ሃ ኡዲፋንላ ኣገናይፔ ሃች ሃ ናሞኡ ታማኔ ኦይዳንሉ ጋላሳፌ ሃ ሲሚን ጸላ ኬላስ ዮቺ ዬጌቲዳ ጋላስ ጋካናስ ዲዛ ዋዴዛ ዋዚናን ዋሊቴኔ ዩሺ ቆፒቴ።

19 ሃኢ ዜሬላስ ጊዲዛ ካሕ ጎታራን ቆይኮ፣ ቃሴካ ወይኔይኔ ባላሴ ሚሊ፣ ኦሮማኔይኔ ዋጋራ ሚሊ ኡባይ ሃች ጋካናስ ኣይፌ ኣይፎንታ ኣገኮካ፣ ሃቺፌ ዶማዳ ታኒ ኢንቲና ኣንጃና ጌስ» ጊዴስ።

20 ሄ ኣገናን ናሞኡ ታማኔ ኦይዳንሉ ጋላስ ጎዳ ቃላይ ቃሴካ ሂዝጊሼ ሃጌኮ ዪዴስ።

21 ጎዳይ ሃጌስ፣ «የሁዳ ሃሪዛ ዜሩባቤሌስ፣ ሓኒ ሳሎኔ ሳኣ ቃላና» ጊዴስ ጋዳ ዮታ።

22 ካዎታ ታ ኢስታ ኣራታፔ ዲጋና፤ ኣላጋ ካዎታስ ዲዛ ዋልቃ ታ ቆይሳና፤ ፓራ-ጋሬታኔ ኢስታ ቶጋንቻታ ታ ሺራ ዬጋና፤ ፓራቲኔ ፓራ ቶጊዛይቲ ኢሶይ ኢሳራ ባንታ ጊደን ሃይቄታና።

23 ሄ ጋላስ ታኒ ታ ኣይሌ ሳላቲያሌ ና ዜሩባቤሌ ታ ኔና ኤካና፤ ታ ኔና ታስ ማታሜ ሾጪዛ ቃላባቲ ሂስታና፤ ታ ኔና ዶራዲስ» ጊዴስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b